

koeke kei a ia nga hau katoa. Koinei te Whanau Puhī, ko aua hau o te takiwa. Koinei nga uri a Huru-te-arangi raua ko Tonga-nui-kaka, nama a Parawera-nui, i moe i a Tawhiri-matea. Me whakaaaro hoki koe ki te karanga a Tane ki a Tawhiri-matea. Kia tonoa mai te Whanau puhī hei patu, hei whiu i te Tini o Poto, i tukuna nei e Whiro hei patu i a Tane. Kua tino marama te hangaitanga o Tawhiri-matea; koinei nga hau o te takiwa: kei te marae o Watea e takaawhio ana.

Tuarua. Ko Tangaroa. He aha ra tona tiwai o tenei atua. e uru nei tona ingoa ki nga karakia a nehe ma e ka haere ratau ki te hi ika. Tona hangaitanga o tenei ingoa he ika, koinei te tukenga mai e nga ika o te moana. o te wai maori. Koinei a Tangaroa ara rau, e whakataukitia nei e nga tangata e ka haere ratau ki te tuku hinaki.

Tutoru. Ko Tane. Engari tenei. he ingoa nui tenei, hau ana te rongo ki nga motu katoa o Hawaiki. Nana nga mahi nunui, nana nga rakau e tipu mai na i ro ngahere, nana i hanga a Hina-ahu-one ki te puke o Tuanuku; nana hoki i tiki nga kete o te wananga i te Toi o nga Rangi, ara i Tikitiki o rangi. Na, mehemea ka tirohia katoatia nga korero mo Tane, timata atu i Aotearoa nei, a ka mutu mai ki Hawaii. ka tino marama te hangaitanga o tenei atua. Koinei te ra e tu iho nei i te poho o Rangi. koinei a Tama-nui-te-ra. Ka kiia te rawhiti ko te ara ura a Tane: ka kiia a Rarohenga, ara a te Reinga, ko te kainga huna a Tane. kei kona ia e huna ana ia ia i nga po. He nui nga korero mo tenei atua e kore nei e taea te tuhi atu. kei tahuri te waka.

Tuawha. Ko Rongo. He ingoa nui ano tenei. Ka ahu atu nga karakia ki tenei atua e ka tahuri te tangata ki te tiri i te kumara. ki te hohou ranei i te rongo e ka mutu te pakanga. Kei Hawaii ano nga korero e marama ai te ahua o tenei atua. E ki ana nga Maori o reira, i te wa i piki ai a Hina ki te rangi. ka mahue tena ingoa ona, a ka kiia tona ingoa hou ko Rongo. Na, kua marama te taha ki a Hina. he nui hoki nga korero mona. Koinei te marama tetahi ingoa ona ko Hina-te-iwaiwa, i uru nei tona ingoa, kinga karakia i te wa e whakamamae ana te wahine i te rauru motu hoki. Tenei ano nga korero e pumau ai tenei ki ko te marama tonu a Rongo.

He nui noa atu nga atua o te iwi Maori, e kore e taea te tatari. te whakahuhua ingoa te whakamarama ranei. Me waiho ena ki tahaki, me whai taua i te tihi o te maunga. i te tino atua o te Maori, e noho nei i te Toi o nga Rangi tuhaha.

Ko Io. Ko Io-matua. Ko Io-matua-te-kore. Ko Io-mata-ngaro. Ko Io-mataaho. Ko Io-te-wananga. E tika ana kia rukea atu etahi o nga atua. i te mea ko Io te kai paihere o aua atua katoa. Engari tenei atua. Koinei te tino atua o te Maori o Aotearoa. o Rarotonga. o Tahiti. me era atu motu o te moana nui a Kiwa, o Tahora-nui-atea. Koia te atua kaore nei i whangaia penei me Tane, me Tangaroa, me Rongo. Kaore kau he patunga tapu ki a ia, ara he raukakai. Kaore he karakia